



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

**Enforcement Directorate-i  
Hemant Soren jaokogo**

**Rohit Sharma ICC Men's ODI  
Team captain kumtsü**



VOL. XXI NO. 101 (ADOK 101)

DIMAPUR RASEMNÜ (WEDNESDAY)

ANJETI (JANUARY) 24, 2024

₹ 5.00

## Naga loktiliba nung GBs ya tongshitem lir: Y Patton



**Dimapur, January 23, 2024 (TYO):** Naga loktiliba nung sobaliba aser inyaksangshi ketdangsürtemji Goanburas (GBs) lir aser parnok dak yimtsüng jenjang nung sobaliba temzüng-ozüng benshitsu tebilemsü khuret tulu lir ta Deputy Chief Minister Y Patton-ashi.

"GBs ya public masü saka tongtipang nisungtem lir aser village levels nung parnok ozüng amertem lir" ta pai ashi.

Mongulbarnü Dimapur nung GBs office building cum customary court lapoktsüdang Y Patton-i iba ya metetdaksü.

"GBs ya sorkar ketdangsübaren nung yariteper aser sensotem nem temeten agütsürtem lir. Parnoki sorkar den yaritepsü aser law & order tiptemba mapa den village level mesüra Dimapur ama urban sector nung ketdangsübaren nung yariteper" ta pai ashi.

"Sorkar ketdangsübaren nung Goanburas ya tetsükdaksü ama masü saka sensotem aser sorkar tsüngda apu alartem ama inyaksüla. Anungji Nagaland nung aliba GBs ajaki nübortem imlaba ama inyaksangshitsu

ayongzüker" ta Patton-isa ashi. GBs union tenteter kum 34 buba nung parnoki aginüba ama office ka yanglutetba atema tetenlar ajak dang kanga pelar, ta paisa shisem.

**BJP züngsemtem den ajuruteper** Mongulbarnü Y. Patton-isa Tourist Lodge nung BJP ketdangpurtem aser karyakartas den senden ka amen.

Pai Dimapur aser Peren district tem atema 'as legislator incharge' mapa agizükba sülen iba senden amen.

Senden nung pai tesentepertem dang party tashitaitba akümsü atema bendanga agütsüshitsu ayongzüker.

Taküm agitsü aliba Lok sabha elections nung party züngsem ajaki alliance candidate yaritsü mepishir ta Dy. CM Patton-isa ashi.

Iba ya alliance partner NDPP den tenangzüktep agiba nung shilem ka lir. Taküm elections nunga BJP-i Centre nung sorkar akümsü, ta paisa ashi.

Y Patton-isa Dimapur district nung party-i timtem ajurubatem asoshi mapa inyaksü aser party office timi ketdangsüla aotsü atema yaritsü nangzüker.

## Lok Sabha election anogo jangjashitsür

**New Delhi, January 23, 2024 (Agencies):** Delhi nung Chief Electoral Officer-i District Election Officers (DEOs) 11 dangi züluba shidi ka nung Lok Sabha elections atema tentative date ka shia liasü.

Iba sangdong nung Delhi CEO-i April 16, 2024 nü provisional poll day ama shia liasü aser iba ya Election Planner nung start aser end dates asadangsü ateam liasü. Iba sangdong ya Assistant CEO T. Misao-i prokshi.

Ajisüaka Chief Electoral Officer, Delhi-i tanü social media

nung anogo shia alibaji "reference" atema dang lir aser ketdangsürtem sentong renemtsü atema dang ta jangjashitsüogo.

Iba sangdong nung shia aliba tentative poll date ya chichiba election schedule den sendaktepa mali. April 16, 2024 ya election ketdangsürtemi ECI indang Election Planner den liromedema sentongtem atongtsü atema dang lir ta CEO Delhi-isa metetdaksüogo.

Election Commission of India (ECI)-i mapang shitak nung Lok Sabha official election schedule metetdaksütsü ta parnokisa ashi.

## Taoba Bihar CM Karpooi Thakur nem Bharat Ratna agütsütsü

**New Delhi, January 23, 2024 (Agencies):** India nung socialist leader tejangja ka aser taoba Bihar chief minister Karpooi Thakur nem Bharat Ratna agütsütsü ta Rashtrapati Bhavan-i metetdaksüogo.

Thakur sülen anidakertemi pa dang 'Jannayak' ta aja aser pai backward castes tashi itdaksütsü atema mapa tajung inyaka liasü.

Thakur ya January 24, 1924 nü aso aser British yimsüsüba anema Quit India Movement

nung shilem agiba atema pa tepuokdak ayu.

1952 kum pai mezüng election nung shilem agia takok angu aser iba sülen pai toktepeba election ajak nung takok nguyonga dang aru.

1978 kum Bihar government services nung backward castes atema shilem lemsükbaji Karpooi Thakur-i tenzüka inyakba mapa ka liasü. Iba ajanga 1990 kum Mandal Commission report mapa aküm.

December 1970 nungi June 1971 tashi Karpooi Thakur-i Bihar Chief Minister inyak aser iba sülen December 1977 nungi April 1979 tashi tanaben inyak. Pa February 17, 1988 nü asü. "India sorkari social justice atema tesangwa Jan Nayak Karpooi Thakur nem Bharat Ratna agütsütsü lemtetba atema kanga pelar. Iba ya pa sor kum 100 ajungba benjungmong nung agütsütsü" ta Prime Minister Narendra Modi-ia metetdaksü.

## MHA teshimtet teloki Arambai Tengol den ajuruteper

**Imphal, January 23, 2024 (Agencies):** Ministry of Home Affairs (MHA) teshimtet telok kati Mongulbarnü Manipur nung Arambai Tengol züngsemtem den ajuruteper.

Züngsem asem agi akümba MHA teloki Meitei nunger telok den Imphal nung ajuruteper.

Interlocutor AK Mishra-aniba MHA teloki Arambai Tengol züngsemtem den anaben tashi ajurutepa senden menogo.

Yashi parnok Imphal tonga aruba sülen Arambai Tengol den ajuruteper aser ano tanü-a parnok den ajurutepa Manipur tensa süngjemtsü atema tebilembatem

lemsatep.

Senden nung Arambai Tengol-i Manipur nung National Register of Citizenship (NRC) update asütsü aser ibaji 1951 base year asütsüla ta takhangba agütsü.

Arambai Tengol-isa tenemlen aliba telungpur teloktem den Suspension of Operation (SoO) agitepa aliba agientsü takhangba agütsü.

Tasembuba takhangbaji Mizoram nung detention centres nung aliba refugees meyipa yoktsüba lir.

Meitei nunger telokisa Manipur nung tanga central force kati Assam Rifles

melenzüksü aser Manipur Scheduled Tribe list nungi ozüng alema arurtem agientsü takhangbatem agütsüogo

Manipur nung maneni tensa mejungi akümba sülen special MHA team ka yoka lir.

January 17 nü telungpurtemi Moreh nung police commandos ana khaset aser aika yirutsü.

Iba tasüngji tatalokba ana nung mejangjaba nisungtemi civilian pungu tashi khaset. Bishnupur district kübok Ningthoukhong Kha Khunou nung civilian pezü aser Kangpokpi district kübok Kangchup Chingkhong nung nisung ka khaset.

## tEA-i 'Uplifting Women Street Vendors' sentong agi

**Dimapur, January 23, 2024 (TYO):** January 23, 2024 nü The Entrepreneurs Associates (tEA)-i Chumoukedima District nung 'Uplifting Women Street Vendors' sentong ka ayonga agiogo.

Iba sentong ya Dhansiripar Block kübok Tsithrongse Village Council Hall nung agi aser Tsithrongse o Murise yimtsüngtem nungi tetsür 60 aden.

Sentong nung mendenji Mulasu Farmers Producer Company Limited CEO Azino Vero liasü aser lai tEA osang lemsatepeba den Uplifting Women Street Vendors Programme

indang maparen metetdaksü.

"Sorkar mapa aginüba putu ka nung tetsürtemi entrepreneurship wadang nung tetsüng ajemoka inyaksüla. Asenoki sen aangtsü atema 'Need' aser 'Want' bendangtsüla aser senotsü kümzüka ayutsüla" ta Project Associate of tEA Tekhengutele Nuh-ia ashi.

Community Mobilizer of tEA Spongchiba-ia The Entrepreneurs Associates ajanga inyakba mapatem lemsatep aser tetsürtem dang senotsü angutsü aliba lenmang balala metetdaksü.

Yimdong nung yokyayokjir Ruth Yanthan-i Entrepreneurs Associates Thrift aser Credit

Cooperatives Federation Limited (EATACOL) den sendaktepa sülen la taküm nung tajangzüker anguba osang lemsatep.

The Entrepreneurs Associates-i October 2017 nung Uplifting Women Street Vendors Program tenük aser iba ya tetsürtem tashi itdaksütsü nükjidong nung tenzüka lir.

Tang tashi nung tEA ajanga Nagaland, Manipur aser Assam nung yimdong nung yokyayokjiba tetsür 7000 nem training agüja yaritepogo.

2024 tashi nung women street vendors 10,000 tashi Uplifting Women Street Vendors Program ajanga yariteptsü teimla lir.

## Rahul Gandhi-i temeten tongshi 5 metetdaksütsü

**Guwahati, January 23, 2024 (Agencies):** Congress lennir Rahul Gandhi-i Nyay Yatra indang temeten mangdang ka sangoktsüogo aser iba nung Congress indang temeten tongshi 5 sayatsü nangzüker.

Taruba ita iba osang tejangja metetdaksütsü aser iba ajanga linük madak tashi agütsütsü tra Rahul-i ashi.

"Iba Nyay Yatra sülen Nyay tangatetba ka lir. Taruba ita ka tsüngda Congress party-i temeten tongshi 5 bener arutsü aser iba ajanga linük nem tashi agütsütsü" ta January 23 nü Assam nung Nyay Yatra mapang osangbener den jembidang

Rahul-i ashi.

Assam CM Himanta Biswa Sarma-i iba yatra anema noktaker. Tekülem kitem, colleges aser padyatras semdangtsü atema tenokdangtsütem ajuruaka iba ajanga publicity talila angur, ta Rahul-isa ashi.

"Assam CM aser Union Home Minister Amit Shah nati memeteti onok yarir. Parnoki kechi tenokdangba agütsüdir agüjaka onok Nyay osangi nübortem atonger" ta paisa ashi.

Linük nung ochimashi lennir tamajungtiba rongnung Assam CM ya ka lir aser pai tenoktanga agütsüba ya

nübortem atsür arutsü atema maangka ka ama züngshir ta Rahul-isa ashi.

"Nisung ajaki Nyay Yatra nung adentsü jaoker. Onoki tongti onük pungu nung rangloker iba sentong agir aser itemji Mamata Banerjee den menden lemsateptsü, OBCs, Dalits, Adivasis, women's injustice aser unemployment lir" ta paisa metetdaksü.

"INDIA alliance ya RSS, BJP aser Prime Minister Narendra Modi anema raraba tangatetba ka lir. Assam Chief Minister-i dang Assam oshi aser sobaliba madak ketdangsütsü makok" ta Rahul-isa ashi.

# Mangmetong nunger lushi tzübi ayong nokdanga tudanga yangluba mesemetet



Tanu tzübi ayong nokdanga tudanga yangluba mesemetetba sentong nungya alakteta jaoker MLA & Advisor Wb.Pangjung Jamir, MLA & Advisor Wb.Imkong L.Imchen den sentong nung adenertem külemi tangokba noksa angur.

## Mangmetong, January/Aenjeti 23(TYO):

Mangmetong nunger lushi tzübi ayongküm Nokjok Lenden nung tanü Mangmetong Yimlang Senso Mungdang-i (MYSM) tzübi ayong nokdanga tudanga yangluba mesemetetba sentong ka agiogo.

Tzübi ayongküm aser temeket nungya Mangmetong nunger kibong 90 shibo alu yimteta teboksünga litettsüsa ali temo lir saka küm aben meyi mapang nung aiben tzübi ayong nungi tzü nungteta adoka alu aika raksaja aruba agi Mangmetong Yimlang Senso Mungdang-i achayanga tzübi ayong tzüji tezülени yimdakja ludaktsütsü asoshi 2020 küm nungi tua yanglutsü tenzük aser 2022 küm iba mapa ya tembang. Iba maparenji temer kelen 2023 MYSM-isa tamalen tzü yima aluba nungji ango metsü nung ajungtsü majungtsü ibaji kanga junga tendanger ango tzübo tua ango metsüba

nung lenmang sadema aliba agi iba tesem nungji ango metsütsü sentong tulu lir.

Tanu tzübi ayong nokdanga tudanga yangluba mesemetetba sentong nungya alakteta jaoker MLA & Advisor Fisheries & Aquatic Resources Wb.Pangjung Jamir-i mapang tatsüka agia jembidang timtem jenti arema nüburtemi iba tzü temdang tulu nübu aika indoka inyaktetba ajanga aluyimertem takum piyong ajangzüktsüta teinyakertem nem tenüngsang aguja ashi.

Tsürabur mapangbo iba ama tzüdi tulu temdanga yangluba ya nungpokasa aitera jembia aru saka nenoki inyakba mapa ya kanga junga inyakogo aser joko tang yanglua tzü yokba leni dang tzüji yima alutsü teimla akar ta MLA Pangjung Jamirisa mapa inyakertem nem tenüngsang aguja ashi.

Tzü temdang tulu yanglur ano tejenba tzü lenmang nung ango tzübo renema anepalutsü

sentong aliba nungji akokba lenmangtem nung Fisheries department-ia akokba lenmang nung yariteptsüta Advisor Fisheries & Aquatic Resources Wb.Pangjung Jamir-isa metetdaksü.

Kansa sentong nung MLA & Advisor Soil & Water Conservation & IPR Wb.Imkong L.Imchen, Addl.Director, Dept of Fisheries Wb.Lotimenba aser Rionsanger Putu Menden Secretary Wb.Kikatamba parnokia shilem agia shilem agia jembiba den Mangmetong Yimlang Senso Mungdang Tir Wb.Longrimendang-i iba mapatong inyaka aruba aser nükjidongtem rasaa ashi aser BJP Party Mangmetong Unit Tir Wb.C.Anung Imchen-i Tsüngrem lenisüba jazüka sarasademer sentong tenzük aser Mangmetong Yimlang Senso Mungdang Tatong Tir Wb.Yashimeren Imchen ketdangsüba nung iba sentong agi.

# BJP Kohima district ketdangsür temi district sema jajar

**Kohima, Aenjeti/January 23 (TYO):** BJP Kohima District in-charge aser co-incharge temi district sema jajaba sentong ka January 22, 2024 nü BJP Kohima District Office nung tenzüka liasü.

Party karyakartas tem den jembidang Legislator Incharge of Kohima District aser Minister, Tourism & Higher Education, Temjen Imna Along-i BJP workers ajunga dang 'Sab Ka Saath, Sab Ka Vikas, Sab Ka Vishwas, Sab Ka Prayas' tangatetba nung inyaksangshitsü ayongzük.

"Asen tamang nung akang-akanga nokdakti aser asen party nung tamang kati," ta pai ashi.

State Vice-President & Incharge of Kohima District aser MP (RS), Phangnon Konyak-i karyakartas tem dang booth level nung party tashi itshtitsü temulung agütsütsüla ta ashi.

"Nenoki mapa meranga inyakba aser inyaksangshibaji booth level indang tashi agi sayutsüla," ta lai ajungshi.

Lai maneni züngsemtem dang Ato Kilonser Narendra Modi-i tenzükba scheme aser sentong balala indang yimdaklir nem angatetdaksütsü aser scheme takok angutsüsa teyari agitsü ajungshiang ta ashi.

State Co-Chief Spokesperson & Co-Incharge,

Akum Pongen-ia voters aser PM Viswakarma ya kanga tongtipang lir ta ashi.

Pai Lok Sabha Pravas Yojana aser Booth Sashakti Karan Committees nung aliba züngsemtem dang Lok Sabha elections tonga arur asünung tali saksalemtsü ashi.

Iba sentong ya BJP Kohima District tatong tir Hanchule Jemu-i anir agi aser State Chief Spokesperson Thomas Magh-i sentong tenzüka sarasadem.

BJP Kohima District tir Khrielie Usou-i pela agizükba o jembia aser Menovikho Viyie, BJYM Kohima District tir ajanga melepzüng o jembia liasü.

# DC Kohima ajanga HoDs tem dang metetdaksür

**Dimapur, Aenjeti/January 23 (TYO):** Deputy Commissioner Kohima, Kumar Ramnikant, IAS ajanga sangdong ka nung HoDs ajunga dang 75th Republic Day anogomung

atema Invitation Cards/Car Passes tem Establishment Branch, Office of the Deputy Commissioner, Kohima nungi January 24, 2024 nü nungi tenzüka office mapang meshitsü metetdaksüogo.

# 10th Dr.MGM International Physiocon 2024 temogo

**Dimapur, Aenjeti/January 23 (TYO):** North East Christian University, Dimapur nung 10th MGM International Physiotherapy Conference sentong January 23, 2024 nü temogo aser iba tatembang sentong nung Nagaland Angh La Ganesan dena liasü.

Nagaland Angh-i iba sentong nung jembidang state nung Physiotherapy mungdang mezüngbuba ayongzükba ngua pelar aser ibai healthcare aser shisaliok tsütsü bendanga agütsür inyakba temaitsü aser alizüing tongtetba ka lir ta ashi.

Iba mungdang ya kanga tongtipang lir, kechiaser asenoki Physiotherapist asür Mahadev G Mokashi bilemteta pa nem akum agütsür, shiba iba wadang nung takotet liasü aser pa mapa ajanga physiotherapy nung kodanga mesamatsü temaitsü yutsü, ta ashi.

Iba mungdang ayongzükba atema Angh-i North East Christian University nem tenüngsang agütsü aser lenla balala nung university tejakleni aoba ngua pelar ta ashi.

Linük tesem balala nungi iba mundang nung adenshia physiotherapists tasen tem nem shisatsü agütsüba ajanga tarutsü nung iba wadang tali tajungba

akumtsü, ta pai ashi.

Iba mungdang omen "Changing Trends: Challenging the Future" ya tantü tensa den kanga peta shimogo aser healthcare tajungba kuma melenshiba putu ka nung physiotherapy nunga dangar menepa jenjang tajungba nung nüburtem nem teyari agütsütsü ayongzükba liasü.

Iba ama mungdang ya ajanga kaketshirtemi takotet nisungtem nungi shisatsü angutsü asoshi sapang agütsür aser kaketshir temi tarutsü nung tasü ita tayongzükba balala ajanga aor, ta Nagaland Angh-i ashi.

Iba sentong nung menden Dr. Alisha Fernandes, Assoc. Prof., HCPT liasü, Prof. Dr. C K. Senthil, Kumar, Founder President, Dr. MGM, PhysioCon ajanga tarur pela agizükba o jembia, Prof. Dr. Darlando, Khathing, Hon. VC, NECU ajanga tepela o jembia.

Maneni Prof. Purnima Singh, Chairman NPFT ajanga iba mungdang osang agütsü, Dr. Bhatni Pratim Dowahrah, Regions Co-ordinator ajanga melepzüng o jembia aser CMER NECU nungi kaketshir temi ken aser tsüngsang balala agi shilem agia liasü.

# NEWJU aser KPC shisadokden senden amen



**Kohima, Aenjeti/January 23 (TYO):** North East Working Journalists' Union (NEWJU) nungi tir Ratul Borah, advisor Sumesh Deka aser assistant general secretaries Jitu Kalita aser Narayan Bahadur nungeri Kohima Press Club (KPC) züngsemtem den shisadokden senden ka Mongulbarnü KPC Office nung mena liasü.

Iba senden amenba nükjidong indang jembidang, North East nung aliba nüburtem journalism ajanga lungjemtsüla, ta Sumesh Deka-i ashi.

Region nung kin balala tebilemtsü indang jembidang, asenoki asenok lungjemtsü aser külemi inyaka asen tebilemtsü asen sasa bentettsüla ta bilemer, ta pai ashi.

Osangbener tem ya azüdokshirtem masü aser Northeast nung aliba state tem ya adianu lir ta pai ashi.

Iba atema pai Kohima Press Club züngsemtem dang NEWJU nung adentsü ayongzükba liasü.

Külemi inyakba ajanga tang aliba tebilemtsü jenti koktettsü aser Northeast nung aliba working journalists ajungtsü atema külemi lungjemer inyaktsüla, ta Deka-i ashi.

Tarutsü nung yaritepa inyaktsü imlar aser Nagaland nung working journalists tetsür tashi ngua pelar, ta paisa ashi.

NEWJU tir Ratul Borah-ia region nung aliba osangbener tem lungjemer pension scheme ama osangbener indang ken o balala jembitsü ayongzükba liasü.

Kohima Press Club tir Alice Yhoshü-ia NEWJU den lungjemer inyaktsü mulunga aliba lemsatetpa liasü.

Iba senden nung Jitu Kalita aser Narayan Bahadur nungeria jembia liasü.



Christian Higher Secondary School Dimapur nung January 22-23, 2024 anogotem Covenant Hall nung 2024 küm asoshi Annual Orientation and Teachers' Workshop agia liasü. Iba sentong nung shisalen sayur ya Dr. Maongwati Aier, IAS (former DC, Dimapur & Chairman & Proprietor, Lima Aier He. Sec. School Dimapur), Dr. T. Alemla Longkumer (Principal, Mokochung College of Teacher Education), Sheyetoli Ayemi (Founder AMIRA School of Math), Laisen Aier (Maxwell Leadership Certified Team Member) aser Arindam Bhattacharya (WordsWorth) nungertem liasü.



Hyderabad nung brachycephalic azü tangola sadema mesashiteta indang metetdaksütsü atema activists temi azü ama sobuba den oxygen mask agi nokdakba noksa nung angur.

### CM Mamata-i Congress aser CPI(M) aitsü

New Delhi, Aenjeti/January 23 (Agencies): INDIA bloc party tem yongsü nung mangatetep adoker aliba mapang Trinamool Congress tekolakba aser West Bengal Chief Minister Mamata Banerjee-i, Bharatiya Janata Party den tokteptsü atema regional lenirtem atema tebilemdangba tasen ka benokogo.

TMC tekolakbai, Congress pur Parnok kija taruba Lok Sabha election nung menden 300 nung tokteptsü shidang. Laisa, Communist Party of India (Marxist)-i Opposition bloc onüktem azüoktsü merangba atema aitsüogo aser ashiba agi, lai ama shingaiia BJP den indang indanga metokteper.

Kolkata nung all-faith harmony rally nung o jembiba mapang Banerjee-i, "tesem karbo regional party tem nem toktsütsüla ta ni ashir. Parnok (Congress) kija Lok Sabha menden 300 nung tokteper aser ni parnok yaritsü. Item

mendentem nung ni metokteptsü. Ajisüaka parnoki parnok mulung dang süner," ta ashi.

TMC tongtibangsa magira Bengal nung parnoki Lok Sabha menden 42 prongla nung tokteptetsü, ta lai shiogo.

Menden lemsatsü atema sensaksem kanga menoa magiba atema Congress metetshi-i Banerjee-i iba party aitsüogo. Bengal chief minister-i ashiba agi, "ni BJP den tokteptsü tashi lir. Ajisüaka menden lemdangtsüba dak sendakba nung nisung kari onoki ashiba manganür. Nenoki BJP den metoktepnüra menden danga parnok nem tagütsü."

Laisa CPI(M)-i aniba Left front aitsüogo aser ashiba agi, INDIA bloc senden parnoki azüoktsü merangba ya lai magizüker.

"Opposition bloc senden ka nung ni INDIA nungja amshitsü benok. Ajisüaka ni coalition senden nung adenba mapang

Left puri senden azüoktsü merangba ni nguogo. Iba ya agizüoktsü makok. Ni küm 34 tashi raraba party den ni hai haura makatsü," ta lai ashi.

Laisa, iba amala mezüngmeshi sülena lai INDIA bloc senden nung odang shilem agir, ta ashi.

Menden lemdangtsü asoshi sensaksem menoba atema Congress party aitsüba sülen Banerjee-i, Rahul Gandhi Assam nung temple ka mesemdangdaksüba indang jembiba mapang temple-i aobaji teperi masü, ta laisa shisem.

BJP anema mapang talangka nokdaka aruba indang jembiba mapang Banerjee-i, "tanü yimden yimsüsürtem kwikati BJP den toktepteter? Kar temple-iogo aser bilemer aji teperi, ajisüaka aji teperi masü. Ni temple, gurudwara, church, aser mosque ajak semdangogo. Babri Masjid mepetmesü ken o atalokba mapang ni yimtung nung nokdaka liasü," ta ashi.

### Enforcement Directorate-i Hemant Soren jaokogo

New Delhi, Aenjeti/January 23 (TYO): Ali dak sendakba ochi mashi ken o ka nung Enforcement Directorate (ED)-i Jharkhand chief minister Hemant Soren jaokogo. Pa dang ken o ashishitsü atema January 27 aser 31 nü ED matsüngdang nokdaksü tetuyuba agütsüogo, ta ken o jangja alirtemi ashi.

Soren-i ED-i pa jaokba tenetben tashi thitsüba sülen Honibarnü pa dang ghonda

tenet shi ken o balala asüngdanga liasü. Ranchi nung ali acre 7.16 dak sendakba aliba ochi mashi ken o jangjashitsü nungdaker ta ED-i shiogo.

Iba ali ya ochi meshi-i alizük kong army indang ali ozüng alem ayokba densema lir. Soren-i, iba ken o ya mejangja aser ali indang osang tejangja nüburtem nem memetdaksüi lir.

Iba ken o dak sendakba nung agency-i nisung 14 puogo, kong

bureaucrat Chhavi Ranjan, aser shishilembar Amit Agrawal aser Bishnu Agrawal nung densema lir.

Honibarnü Sorin-i, pa pusemertem dang linük ajunga nung Oppostion tem longjemer parnok tejangdangi odar ta ashi. "Nenok tsübuttsü kecha mali. Asenok dak khaloktsüba injang mezüngbubaji nenoki leniri agitsü ta ni tenangzükba agütsür," ta pai pa pusemertem dang ashi.



Gurugram nung Republic Day atema parade rehearsals agiba ajanga gari senzusenpongtsü tenokdangba agütsüba agi Delhi- Gurugram expressway nung gari senzusenpong mesademi akümba noksa nung angur.

### Rahul Gandhi-i Assam CM Sarma aitsü

New Delhi, Aenjeti/January 23 (Agencies): Congress party lenir Rahul Gandhi-i Mongolbarnü asendenshir Assam chief minister Himanta Biswa Sarma aitsüogo aser ashiba agi, pa ya ochi mashi CM tamajungtiba rongnung ka lir. Congress lenir lenisüba nung tang Manipur nungi Mumbai tashi Bharat Jodo Nyay Yatra sentong ayongzükka agidar.

Mongolbarnü Congress züngsemtem shirnok Guwahati yimti-i midaktstü nokdanga ayu parnok aser Assam police na mangatetep adoka liasü.

Osangbenertem den sensaksemba mapang Rahul Gandhi-i ashiba agi, "state indang tebilemtsüji Assam, chief minister lir, shiba linük nung ochi mashi CM tem rongnung ka lir. Assam CM-i yatra anema kechi inyaker iba ajanga yatra nem teyari agütsür. Iba yatra indang ya aikatibo memeteti lila saka tangbo aikati meteta kümogo. Assam nung Bharat Jodo Nyay Yatra ya ajak dang tongtibangtiba ken o kümogo. Temple aser college tem mesemdangdaksüba parnok inyakyim lir. Parnoki

amokmerenba onoki kecha tsübua mali."

Mongolbarnü Himanta Biswa Sarma-i state director general of police (DGP) dang, lokti rongmesoba atema Rahul Gandhi anema ken o ka benoktsü tetuyuba agütsüogo.

Social media sabang X ajanga Sarma-i, "Naxalite tactics" ya Assam sobaliba masü, ta ashi.

"Iba ya Assam nung sobaliba masü. Onok yimjung nung aliba state ka lir. "Naxalite tactics" ya onok sobaliba masü. Ni DGP Assam Police dang lokti rongmesoba atema nenok lenir Rahul Gandhi anema ken o ka benoktsü tetuyuba agütsüogo aser nenoki post asüba footage tem kuli ama amshitsü shiogo. Nenok mesüngjemtetba yimyayimpong aser mulungteper aliba arlla sülen manidakba ajanga Guwahati nung gari senzusenpong mejungi kümogo," ta Sarma-i X nung post sütsü.

Kasa mapang nung Rahul Gandhi-i ashiba agi, state nung aliba kaketshirtem den sensak asemstü atema pa nem temelaba magütsü.



Ato Kilonser Narendra Modi aser Congress tir Mallikarjun Kharge nati Netaji Subhas Chandra Bose asoba anogo New Delhi kübok Samvidhan Sadan, Central Hall nung Netaji nem tetushi agütsüba sülen tangokba noksa nung angur.

### Parliament telung nung noksa aser video metangoktsü tuyu

New Delhi, Aenjeti/January 23 (Agencies): Parliament staff tem dang Parliament House complex telung nung noksa aser video metangoktsü tetuyuba agütsüogo, kechiyong iba ya security inyakyim anema lir.

Parliament House, acting joint secretary (security)-i sangdong ka ajanga ashiba agi, tetuyuba aiben agüjaka ketdangsurtem kari inyakyim sülen manidaker.

"Parliament complex ya India nung ajaki amokmerenba tesem ka lir. Security dak sendakba nung Parliament House Complex telung nung noksa aser video metangoktsüba ya sentong yanglur aliba nung shilem ka lir," ta January 19 circular nung shia lir.

Camera, spy camera aser smartphone tem ya iba complex tekümbükba kübok toktsütsü aser security atema amokmeren ka lir ta shia, Lok Sabha aser Rajya Sabha secretariats, Ministry of Parliamentary Affairs aser Parliament House

Estate telung nung aliba tanga allied agencies ketdangsur aser staff ajak dang Parliament House telung nung noksa aser video agitsü memelar ta shiogo.

"Parliament House Complex telung nung noksa aser video kecha metangoktsü atema mobile phone/ smart phone amshitsü temelaba agütsür aliba K e t d a n g s ü r t e m / tesemdangertem nem tenokdangba agütsür," ta circular nung shia lir.

Parliament, parliamentarians, tanga tongtibang ketdangsurtem aser staff tem kümzükka toktsütsüji Parliament Security Service mapa lir.

January 31 nü nungi tenzükka ita ka tepeyong Parliament Budget session tenzüktsü lia aser tesemdangertem gallery nungi Lok Sabha chamber-i nisung ana jokoka ia mokozi yellow adokdatsüba canister tem lapoka mokozi longdaksüba sülen iba tetuyuba agütsüogo. Nisung ana ya MP temi pua liasü.



## TIR YIMYIM YIMOBILEM (EDITORIAL)

DIMAPUR RASEMNÜ, JANUARY (AENJETI) 24, 2024

### Temelenshi tajung ka aruogo

**N**agaland police nung dang masü saka Prisons, Forests, Fire & Emergency Services, Lokayukta, Home Guards aser Civil Defence nung inyaktsü atema sepaitem shimtsü asoshi government-i telemtetba agibaji Naga nunger lanurtem asoshi osang tajung ka asütsü. Atangji, iba telemtetba agiba yagi Nagaland government nung, talisa police ketdangsüba maparen nung tang teinyakdak DGP Rupin Sharma arur külen temelenshi tajung tuluka atalokba angur. Nagaland government mapa nung inyaktertem ita sen agütsür magütsüma lir. Ano, talisa Nagaland police nung nisung tasen shimokpet shimoker saka kodang, koma shirnoki shimoker memetet küm aika aruogo. Aji oda, Nagaland police nung inyaknertem asoshi Nagaland police mapai aitsü atema tenüng agütsütettsüsa nübertemi meteta yimjak nung sangdongba mangashidang, temaba jenjang nung tashikartem aser parnok den tesendaktep junga alirtemang Nagaland nungbo police mapaia itetba lima aser government-sa aruogo. Ajisüaka, taoba küm NSSB kümteta government mapa nung inyaknertem shimba sülen tang Department Recruitment Board ajanga police zünga department tenet nung constable shimtsü asoshi telemtetba agiba jagi police mapa inyaktsü atema tetemsü aser tangatet lanur aika mapa angutsü. Iba jagi Nagaland nung police inyakyim nung temelenshi tajung ataloka angutsü imlar. Tangbo Nagaland nung ashi auyaba aser ozüng raksartemi bener arutsüba tebilemsü dang nungi police-tem chiajemba nung mazüokba aser police-temiang ozüng raksaba mapatem inyakba tebilemsütemang tuluba küma aoba asenoki angashir aser angur. Ibaji melenshitsü atema yaküm küm DGP ajanga police-tem nem peisasa pei taküm mazüoktet chiajemertem mapa nungi anentsüba aser peisasa pei taküm melenshinertem melenshitsü atema mapang agütsüba asenoki angashiogo. Iba sentong ajanga Nagaland police aika taküm melenshidagi aser police inyakyima tangsa tajungba aser temerükba küma aotsü imlar. Iba denji külemi ano police-temia Assam Rifles aser Army-temi inyakba ama nübertem alidak tonga oagi mapa tajung inyaktsütsü lemtetba jagi Nagaland police o nübertem na tesendaktep aser mulunglemtet tajungba küma aotsü imlar. Tangbo nübertemi police angu dang teyarir arur ama masü saka timtem agütsütsü arur amai repranger. Aji oda, tangbo police station nung nübertemi teyari angutsü kangabo meimlar. Item mulungmelemtettsüsa akümba shisatsü aser tebilemba ajakji kodang police nung constable-tem Recruitment Board ajanga indangindanga shimdir melenshia adoktsü aser police-temji shitakba nübertem asoshi mitkar akümtsü. Joko, asenoka state kümer küm 60 dak tali aoer asünungji, tajung kümnüa temelenshi tajung ka arutsü tenzüker südi ta bilemer. Aji oda, government nung ketdangsütsü atema mapa tulu nung inyaktsü purtem NPSC ajanga shimtsü aser iba teküpbok jenjang nung inyaktsü purtem NSSB ajanga shimtsü aser tang police mapa inyaktsü purtem department tenet nung Department ajanga shimtsü ta kodang mapa ajak indangindanga inyaka odir, idangji dang temelenshi tajung asen tenük agi ngua arutsü. Atangji, alima nung nisungi inyaker asünungji noklang shilem nung noklangbo ochishia aser indangindanga meinyaktettsüa akok, aji alima yimya anungji angateter. Ajisüaka, asenoki tang amaji government mapa nung inyaktsü atema nübertem dang yimjak nung sangdonger shimra, Naga lanurtem mapa shia nung tajungtiba rongnung tajungtiba mapa ngua itettsü, idangji dang Nagaland ajungtsü. Tangbo Nagaland policetemi anir machimajemtsü chiajema aru nung kodaser Nagaland ajungtsü? Aji oda, engineering mazüng ser enginer inyakdaksü nung asenok ajangzükdima? Nagaland yimten onük aser tensa tia indang memetet aser süoki ia mebilemba nisung yimsüsür aküm nung Naga yimten latettetdima? Tsüngrem o bushitsü aser sarasademtsü mejangrar ka sannüker aküm nung arogo jungdima? Ibaji Nagaland-i angatetogo aser Nagaland jungdaksütsü atema peisasa pei melenshitsü tenzüka mapang ka aruogo.

## OLEMSABANG

### Ochimashi agi takar akümdangbo meranga inyaka tanü poksüng tajungba

~ L.Kika Pongener.

Tanü asenok aliba putu ya, libalirotsü kanga tasak, talisa, sensaker/makamaiter alitsü kanga tasak lima ka kümogo. Aji oda, sensakerbo lokti nunga mezüngshiba/mezüngokba lima ka kümogo. Anungji nisung aikati, taküm jangradema linudang, aser lokti nung tangar den atongsema/atongoka linudang, ochimashi mapa inyaka rongsen bendentsü meranger, mesura ochimashi mapa agi jangradema alitsü lenmang bushir. Atangji, tanü lima den jangyu-medema linudang, metetsümonga aibelena ochimashi inyaka rongsen bendentsü meranger. Tsüngrem oi ashir... "Takar akümtsü temerang; Aji nokdangtsüsa na shisa kang. Nai idakji tenük yokdang, aji oa-adoker. Kechiyong aoksa rongsen dak tashikang tener Orija ama anungleni yima oa-adoker" (A.Shin-23:4). Iba lai o nung ashiba ya... Tim masüba lenmang, ochimashiba lenmang nungi takar akümtsü temerang ta ashirba... ta angateter. Aji oda, tim masüba lenmang nungi bener aruba rongsenji Orija ozü ama tashikang tener yima oa-adoktsü. Tetezü... Aika bendenyongjia asenok magishitsü, memetetba lenmang kar nung dang endoktsü... ta shinur.

Asen mimchirtemi asen ket nung rongsen aika alinungdang, taküm ya jangradema alitsü amai bilemer, saka rongsen aika bendena yur, maneptetba tashidak kar agi meneper, ayako dena timtema lira, aji kechi jangrademtsü taküm asütsü (?) Asen ket nung rongsen aika meliaka, asen temang anema lia, kechi chinur, kechi jemner ajak chiteta/jemteta lira, aji-ang rongsen tulutiba asütsü. Shin o nung ashiba ama... "Anema alibaji rongsen"... Ibaji-ang jangrademtsü masü no ??? Asen temang shi nung timtem tulu keter rongsen aika akaba dang nungibo, anema junga lia tanü poksung aliba-sa tajungtiba. Tsüngrem oi ashir... "Timtem keter rongsen tulu akaba dang nungi; Kibuba tsübuba den tera akaba tajungba" (A.Shin-15:16).

Kibuba tsübuba den tera akaba tajungba... Tetezü, Tsüngrem tsübua ochishia inyaka, tim lenmang nungi tera akaba tajungba.

Ashikülaka aser külak-kübonga bener aruba rongsen aser chiyungtsüji nisung aikati kanga nang-nanga bilemer, saka ibajagi asen taküm/kibong asoshi tesulen kechi ataloktsü, ajibo meshisadanger. Tsüngrem oi ashir... "Külak-kübong agi bena aruba chiyungtsü nisung tsüngdang tanang; Saka tesulen pa tebang lungsang agi asüngtsü" (A. Shin-20:17).

Tanü putu nung nisung karbo, manger-mesangwa tsüngda (Over-night) nung takar akümbaa lir. Pa/la itasen anguba nungia masü, alu meranga züsena ayimba nungia masü, shishilempaba mapa kar meranga inyaker tajangzük anguba nungia masü, saka kong nungi angur'ar odi-odia meshitetba lenmang kar nungi, oda "Snake game' nung khenyongi 1-100 tashi atuba amai, khen nung dang takar akümba karbo lir. Ashiko, shibai metet... aji tim lenmang nungi anguba, mesura ochishia inyaker bener aruba rongsenbo masütsü sudi...!!! Tsüngrem oi ashir... "Ajongben anguba rongsenji ajema akümtsü; saka züsenba agi terara shibai bendendir pa züintsü" (A.Shin-13:11). Atangji, ajongbena rongsen aika mashileni bendener, manger-mesangwa nung takar akümba rongsenji koloni aotsü (?) Kechi nung endoktsü'ar memetet...!!!. Ajisuaka, asentsü sena meranga inyaka terara benden-ra... ashiko ajibo nang-nanga tachi-shizüka achitsü aser amajok/angadi nungbo meintoktsü sudi.

(Maneni asüng adok nungi)

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

## China nunger pastor ka küm 14 tepuokdak ayutsü

**Aenjeti/January 23, 2024 (Agencies):** China nung aliba court kati Protestant pastor ka küm 14 tepuokdak ayutsü obendang agütsü. Pastor kinungtsü aser par arogo züngsem pezü küm asem nungi ter tashi tepuokdak ayutsü temerenshi agütsüogo. Ozüing tashimait kumdaktsütsü atema parnok ajaki 'superstition' amshiba nung aibelenba ngutet. Dalian yimti nung aliba Ganjingzi District People's Court ajanga arishi küm 60 tain Pastor Kan Xiaoyong ya tepuokdak küm 14 ayutsü obendang agütsü aser pa kinungtsü Wang Fengying küm pezü aser arogo züngsem pezü - Chu Xinyu, Zhao Qianjiao, Zhang Songai aser Liang Dongzhi - tepuokdak küm asem nungi ter tashi ayutsü obendang agütsü, ta Radio Free Asia ajanga ashi.

Kan ya küm 20 alema tepuokdak ayutsü imla liasü, ta RFA ajanga ashi. Ajisüaka par okatsür temi tasü ita nokdakba ajanga ketdangsur temi

temerenshi ajemtsü. Kasaji Wang ya küm 15 nungi 18 tashi tepuokdak ayutsü imla liasü, saka tatem nung küm pezü lemtet.

Tepuokdak ayutsüba küm ajemaka tai tonglokja alir parnok kati aibelenba mali, ta osang ajanga ashir.

Kan aser Wang ya Wuhan nungi 2018 küm Dalian-i aru aser online ajanga sayutsüingiba sapang, Home Discipleship Network amenok. Dalian police-i parnok den arogo züngsem pezü ya October 2021 nung apu. Online nung Kan sülen anidaker jenti akumba aser par arogo sorkari temelaba agüja maliba ajanga Chinese Communist Party atema tetsükdaktsü akum aser apu ta ashir.

Police temi asüingdangyaba mapang parnok reshikangshia amshi, ta Kan aser Wang nati ashi. Iba taitsüba ya okadak benok aser ketdangsur temi maitsü. Sorkari tenokdangba balala agütsüba ajanga China nung Protestant arogo tali

paksar, ta Beijing house church ka nungi Xu Yonghai-i ashi.

Protestant arogo ajak sorkar kübok aliba Three-Self Church nung adentsü Tir Xi Jinping indang sorkari merangba nung shilem ka ama iba temerenshi tulu ya agütsür, ta Bitter Winter ajanga ashir.

Kan aser pa den külemi aitsür tem anema benokba ken o ya "illegal business practices" aser ozüing balala mapa kuma inyaka aoba nung tetsükdaktsü agütsütsü mechi "xie jiao" amshibatem lir, ta Bitter Winter magazine ajanga ashir.

Xie jiao tetetzü "heterodox teaching" aser China ketdangsur temi danga tamangba yimsü amangba telok tem nem iba tenüing agütsür. Kan indang arogo ya Protestant house church ka lir aser iba tenüing jaloktsütsü malang.

Kan ya Wuhan nungi aser takok ngua shishilempar ka liasü aser par kibong ya CCP den tesendaktep liasü. Par kibong ya 2018 nungi Tsüingremer wadang nung ajemoka liasü.

## ANOGO ABEN TSÜNGREM DEN

### Khrista ne dak alibaji nütüungsüba

*Aji temeshi pur nem metetdaktsütsü Tsüngrem temulung chia liasü: iba miim oji nenok dak aliba, paji sentsüwangshi teimla. Kolosi 1:27*

Tetenzük nungi kotaker Tebu sentongji Pa chir tamangertem dak lidaktsütsüba liasü. Na Khristan ka süra Tsüngrem tabensaba ajak ne dak lir. Khrista takümüji ne taküm akümer. Kodang Khrista ne dak lidir, Pai kotaker temoatsü ajak ne dangi bener arur. Ne nüngdak ajak nai kangki nung asüba aser shia aruba aser alima madak Kibuba dak nai angur. Kodang Tsüngremi na Pa mapa nung atentsü ajar, ne taküm ajanga Pai nüngloktsüba mapa inyaktsü asoshi par chir ne dak lidaktsür.

Nü Khristan taküm asoshi ibai tongtipang lir. Nütüungsüba tekolok temetetba aser Laishiba tekongtem temulung nung ayuba dang nungi tongtipangba lir. Ibai Yisu Khrista ne taküm nung sadoksadoka litettsüsa ne taküm Pa nem bendanga agütsüba lir.

Na ajanga mapa tulu inyaka na meketa aliba purtem dangi Tsüngremi jungkai adoka sayudaktsüner. Pai ne dak anogo shia ner kibongi Khrista ngua lidaktsüner. Tsüngremi ne taküm ajanga Pa temeim sayudaktsüner. Khristan taküm ka aliba aser ne taküm nung Khrista taküm alitsü melaba nung tepila tulu lir.

## Nigeria nung Khristanpur alidak nisung tepsetba tali akumer

**Abuja, Aenjeti/January 23 (Agencies):** Nigeria linük nung September ita nungi tenzüka Khristanpur aliba tesem nung nisung tepsetba tali akumba sülen Kaduna state indang governor-i arogo lenirtem den ajurutepa liasü. Iba linük nung January ita tenzüker mezüingbuba hopta ana nunga nisung 25 tepsetogo.

Southern Kaduna state nung Khristanpur timba aliba Kagarko County nungi Dnata Chiefdom indang Khristan lenir James Bitrus-i ashiba agi, tesüiba ita pezü tsüingta iba tesem nung Muslim kiralongrar temi Khristanpur 100 dak tema tepsetogo.

"Item lendong ya September ita nungi tang January ita tamajungba kumogo. November ita nungi ozü nübur aika jena ogo; aluyimer tem alui moteter. Aji yutsür tesüiba ita pezü tsüingta tamanger 100 dak tema tepsetogo," ta Bitrus-i Christian Daily International-Morning Star News dang ashi.

January ita tetenzüklen kiralongrar temi tamanger 25 tepsetogo aser 100 dak tema pua bener ogo, ta pai ashi.

"Yangji tesüiba küm pua bener aortem maden," ta Bitrus-i ashi, shiba indang Dnata Chiefdom indang headquarters ya Gujeni town nung lir.

Kaduna nung kiralongra anema ola adokba asoshi Bitrus aser Khristan lenirtemi governor Uba Sani aser security agency indang lenirtem den January 16 nü ajurutepa liasü.

May ita nungi governor inyaksang Sani-i Khristan lenirtem dang, Kauru, Kajuru, Birnin Gwari, Igabi, Chikun,



Nigeria nung yimjung aser tesunep alitsü yimyim ayima Khristanpur Abuja nung jajaba noksa nung angur.

Kachia, Kagarko aser Kaduna-Abuja Road tesemtem nung tawa lendong ajuruba azüoktsü asoshi shisa lemsateptsü atema iba senden ya amener ta ashi.

Tesem kar kiralongrar inyaksangshi tesep kumogo ta pai ashi.

"Tang tesüsa item tesem nung atalokba ajanga iba lenmang nung front ka tanaben lapokba sayur, aser ibaji ajanga asenok tali ranglokshitsü aser amalitep akatsü nüngdaker ta sayur," ta pai ashi.

"Bandits aser kiralongrar temi tawa aliba metet, talisa Maganda, Kuyello aser ano Buruku, Udawa, Damba, Kuriga, Polewire meketa aliba yimtsüngtem nung mita atar nüburtem aser timtem ajurua alir nem telangzüba agütsütsü meranger security forces dak amaker."

Chikun, Giwa aser Igabi

tesemtem nunga tebilemtsü lir, ta pai ashi.

"Kauru general area nunga kasa lendong agütsüba angur aser Dokan Karji nungi Kajuru tashi aser Kachia nungi Bishini general area tashinung nisung apuba lir," ta Sani-i ashi.

Item tesemtem nung Nigeria sorkari tekeraba nung kiralongrar inyaksangshi mita aotsü nüngdaker, ta Bitrus-i Christian Daily International-Morning Star News dang ashi.

"January 13 nü Maraban Idda nung tamanger trok pua bener ao aser tang tashi item nisungtem ya mechioki lir," ta pai ashi.

Gida Biyu yimtsüng nunga tamanger aika pua bener ogo, ta ashi.

"Item kiralongrar yagi anüngdang aser aonung melie Khristanpur dak amaker aser yimtsüngtem amaker. Aser

onoki sorkar aser security agency tem dang onok timtem shiogo, saka kecha meinyaker," ta Bitrus-i ashi.

Kajuru arem nung Islamic kiralongrartem tesep yanglua lir.

"Security agency temi iba ya meteta lir, saka item kiralongrar azüoktsü atema kecha meinyaker," ta Bitrus-i ashi.

"Kaduna state aser Nigeria sorkar dang lungjemer onok kumzüktsü ajungshir. Onok aliba tesem nung military base ka amenoktsüla ta mepishir."

Alima nung Khristanpur pua bener aoba ya Nigeria nung timba lir, kong October 1, 2022 nungi September 30, 2023 tsüingta nisung 3,300 pua bener ogo aser tamangba yimsü mechi nisung 4,118 tepsetogo, ta Open Doors' 2024 World Watch List (WWL) ajanga ashir.

Tekülem ki aser mozüki, school aser cemetery ama

danga Khristanpur ki o jen nung timtem agütsüba nunga Nigeria ya jenjang tasembuba nung lir, kong iba ama timtem atalokba 750 liasü, ta WWL ajanga ashir.

Alima nung Khristan ka alitsü asoshi tamajungtiba linüktem rongnung Nigeria ya jenjang trok buba nung lir aser taoba kuma kasa jenjang nung liasü, ta 2024 WWL nung shia lir.

Muslim Fulani nunger million aika Nigeria aser Sahel region nung alir aser parnok ya kin balala nungi jakzüka, aser parnok kari Islamist ideology metsünga-reta amshir, ta United Kingdom indang All-Party Parliamentary Group for International Freedom or Belief (APPG) ajanga 2020 report nung shia liasü.

"Fulani, Boko Haram, Islamic State West Africa Province (ISWAP) aser danga telungpur temi Khristanpur aliba tesem meita aor, tepseter, tashiyim amshia shi nung medemer, sen meshitsü mesüra alar ama ayutsü asoshi pua bener aor," ta World Watch List ajanga ashir.

"Fulani, Boko Haram, Islamic State West Africa Province (ISWAP) aser danga kiralongrar temi Khristanpur aliba tesemtem maka tamangertem tepseter, tashiyim agi shi nung medemer, pua bener aor," ta WWL ajanga ashi.

"Taküma linük south tsütsü Khristanpur timba aliba tesemtem nung tali azüdokshir... Nigeria sorkari ibai tamangba yimsü tsütsü reshikangshiba masü ta maneni ashir, anungji Khristanpur temeden anema inyakba memerenshi yutsür."

AO OSHI ANGAZÜKDAK: TANÜ ANGAZÜKTSÜBA OJANG



Shisadang

(v) bilemdanga asadangba (ponder)

\* Onoki alima tia indang shisadang.

Shisajen

(n) shisatsü bendena ayudak (encyclopedia)

\* Asenok oshioben mesamai amshitsü atema shisajen ka nüngdaker.

OLONG PAITEP # 6676

Grid for crossword puzzle #6676 with numbered squares.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S\_ \_ \_ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong talemangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6675 TELANGZÜBA

TIPIEN :

- 1. Tanga, 6. Wara,
7. Rajang, 9. Anük,
10. Jenjang, 11. Alar,
14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer,
9. Anema, 10. Jabili,
11. Among, 12. Miim,
13. Anem.

NAI-A YA METETTER MA



Highest followers on Instagram (As on January 21, 2024)

Table with 3 columns: SN, Instagram Account, Followers [In Million]. Lists top 20 accounts.

SÜR KÜM KA AJUNGBA MENUNGRAA BILEMTETER

Lolenpenla Jamir

4TH AUGUST 1976 - 24TH JANUARY 2023



Yashi ama dang bilemer, saka küm Ka süitemogo, aser na onok mulung nung teti lir. Nü Temeim, Ajemalu, Taochi akaba aser Nendaka inyakba kodanga amatsü makok. Iba anogo nung onoki na kanga menungra bilemteter. Nü taküm ya Temoatsü ka liasü aser onok asoshi teti Tashi asütsü. Tebangi meshitettsüsa onoki na meimer aser masadangtettsüsa kanga menungrar.

- TEMEIM KINUNGBO, JABASOTEM, JALA ASER KINUNGERTEM.

Assam CM-i Jorhat nung terenlok mapatem reprangshim

Jorhat, January 23, 2024

(Agencies): Assam Chief Minister Himanta Biswa Sarma-i January 23 nü Hollongapar nung Bir Lachit Barphukan kürakyanglu yangluba tesem semdanga liasü.

Iba mapang CM Sarma-i Prime Minister Narendra Modi-i Assam semdangtsü aliba maparen atema senden amen. "Tanü Jorhat district nung

terenlok mapa balala inyakba reprangdangogo. Hollongapar nung Bir Lachit Barphukan kürakyanglu yangluba semdang. Prime Minister Modi-i Assam semdangtsü aliba atema onoki olemtepogo" ta Sarma-i ashi.

Bir Lachit Barphukan kürakyanglu ya Rs 175 crore endoka yanglur aser iba ya Assam-i tasütait General nem

tetushi agüja yanglur.

Taruba hopta ishika tsüngda 150-foot bronze statue ya sayatsü imlar.

Iba tesem nung Lachit Barphukan indang grand museum aser interpretation centre ka yanglutsü.

Maneni Ahom Kingdom aser Lachit Barphukan indang war museum ka nung tongtipang artifacts/relics ayutsü.

Manipuri Muslim 4 drugs shibelenba atema meindok

Imphal, January 23, 2024

(Agencies): Manipur nung Muslim nung tongtipang telok kati Muslim nung pezü tashi parnok yimtsüngtem nungi meindokogo.

Par pezü yagi un-Islamic aser anti-social activities inyakba atema iba mapa inyak aser Muslim telokisa bangdakpurtem dang parnok ozüng tesashi agi merenshitsü takhangba agütsüogo.

All Kwakta Co-ordinating Committee (AKCC), Bishnupur nung tanü osangbener den jembidang Jamiat Ulema-e-Islam (JUI) president Moulana Islahuddin Qasim Khulakpham-i Manipuri Muslim nung pezü aitsü.

Par pezü ket nung drug bona lia apu aser Islam nung drug shibelenertem talidak mali, ta Khulakpham-i ashi.

Police-i apur nem temerenshi

tulu agütsütsü aser parnok tepuokdak nungi magizütsü ta pai ashi.

Par pezü ya pei pei yimtsüngtem nungi aridokogo anungji shingai meyaritsü mepishir, ta Muslim lennirisa ashi.

Hombarnü police-i Bishnupur District nung Md. Sahidur (28), Md Samir Khan (18), Md Nasir (19) aser Md Imtiyas Khan (18) nung ket nung heroin seret 1.8 bona lia apu.

Guinness World Record atema Karbi nung tenüng asanger

Guwahati, January 23, 2024

(Agencies): Assam Chief Minister Himanta Biswa Sarma-i January 23 nü Karbi Anglong nung dang Guinness World Record tasen ka yanglutetba atema tenüngsang agütsü.

Karbi Youth festival nung nisung 721 külemi stilts nung jaja aser iba ajanga taoba mapang nisung 250 agi yangluteta aliba

otsü ajatet ta CM Sarma-i ashi.

Iba record ya Guinness Book of World Records indang official adjudicator ajanga kuli agüja liasü. Iba atema Karbi Anglong Autonomous Council (KAAC) nung chief executive member Tuliram Ronghang nem kulikaket ka agütsü.

KAAC-i Karbi Cultural Society den külemi Dipu nung

50 buba Karbi Youth Festival ayonga among.

Nisung 721 tarensena noktakbaji kilometre 2 talang liasü aser parnok stilts nung minute 10 jaja.

Parnok ya Kengdongdang ta ajaba traditional sport asayartem lir aser iba atema Karbi nungeri aou agi stilts yanglur tamasa asütsü tokteper.

## China anentsüh lendong nung asür nisung 20 jungogo



China mitkar temi anentsüh nungi takum jenbua alirtem repringba noksa ka yangi angur. Hombar anepdang Zhengxiong County kübok yimtsüing ana nung anentsüh alua nisung aliba ki 18 anebang.

**Beijing, Aenjeti/January 23 (Agencies):** Southwestern Yunnan nung anentsüh alua nisung aika anebanga sülen China nung teküzmükertemi item nisungtem agitetsü atema meranga inyakdar.

Hombar anepdang züingia lia nüburtem mejangr aliba mapang tenem nung aliba Zhengxiong County nung anentsüh agi yimtsüing ana dak kongshiba sülen ki 18 aser nisung 47 anebang liasü.

Anentsüh aluba sülen ghonda 30 dak tema süier külen nisung metsü asübabo jangjaogo, aser nisung 24 tashi tang tashi monguteti lir, ta state broadcaster CCTV-i ashi.

"Tenem anenzüka alua nisung aika anebanga liasü," ta tenük kuli agütsür Gu-i state meyong television dang ashi.

Pai ashiba agi, anentsüh agi anebangertem rongnung par kinungera pezü densema liasü. "Parnoki kidang mejanga liasü," ta pai ashi.

State news agency Xinhua-i ashiba agi, subzero temperatures nung aonung ka süidaktsüba sülen teküzmükertem mapang den aritepa kanga meranga inyakdar.

China tir Xi Jinping-i, takokba tashi nüburtem agitetsü atema inyaktsü tetuyuba agütsüogo.

Xinhua-isa, tenem ka anenzüka alua sülen iba lendong atalokogo, ta Zhaotong indang natural resources and planning bureau director Wu Junyao-i ashiba metetdakja liasü. Iba bureau yagi anentsüh agi kongshiba yimtsüing ana ya densema iba tesem nung yimtsüing pongu tashi achaayanger.

Sepaitem densema teküzmükertem noklang aika iba tesemi yokogo. Iba tesem ya tenem lima ka lir aser asükwa rürjeb agi tenem ajunga labanger. Anentsüh agi kongshiba yimtsüing ana ya tenem tsüing nung amenoka lir aser iba tesem nung alir nisung 500 dak tema aninogo.

State media-i sayuba noksa aser video tem nung teküzmükertemi concrete block aser aürjeb agi labanger kilem

chireper alibatem nung taküm alirtem bushiba sayuogo.

"Ni mejanga liasü saka kü adianu kati nkishi nung akoshia meso. Parnoki ashiba agi anentsüh alu aser yipden arakzüa liasü, anungji parnoki aritepa upstairs-i atua onok meso," ta arishi küm 35 tain Luo-i Associated Press news agency dang ashi.

Lou, la kinungbo aser lar tanur asem yimdaklirtem den school kati anir oa idakji jenoka lir.

Luo-i ashiba agi, lar kinunger ana den tang tashi tongtepratep mesüteti lir, shirnok anentsüh aluba tesem anasa lilaliasü. "Ni inyaktsüba ajak agi atatsüba dang lir," ta lai ashi.

China kübok tanga province aika den Yunnan-a taküm kanga temekong lir, ta National Meteorological Centre-i metetdaksüogo.

Taoba hopta northwestern China kübok kinük nung aliba ski asüba tesem ka nungi alima

penzüertem aika aninogo, kong rür kanga aluba ajanga avalanche aika alua nisung 1000 dak tema hopta ka sabanger liasü.

Avalanche aluba ajanga alima penzüertem aser Xinjiang kübok yimtsüing ka nung alirtem taolen makai aküm. Iba tesem ya Mongolia, Russia aser Kazakhstan den arrtsü nung lir.

Hombarnü anentsüh ya kodaser alu iba indang osang tejangja ka mali. Zhengxiong County ya Beijing nungi km 2,250 pilar lir aser iba tesem nung tenem meter 2,400 tashi talanga lir.

China nung tzunglu kanga sashia aruba aser ki junga meyangluba ajanga anentsüh agi kanga bulua kongshia teraksatsüba aika ataloker.

Taoba kuma Inner Mongolia region nung anentsüh aluba sülen nisung 70 tepset kong open pit mine ka nung nisung 50 dak tema asüba densema lir.

## Ukraine nung missile agi civilian trok tepset, aika yiru

**Kyiv, Aenjeti/January 23 (Agencies):** Ukraine yimtiba Kyiv aser Kharkiv yimti nung tenük yoker Russia nungeri missile khaloktsüba nung nisung trok asü aser aika yiru, ta ketdangsürtemi ashir.

Linük north-east tsütsü Kharkiv yimti nung Mongulbarnep nisung aliba ki nung missile agi kongshia nisung pongu asü aser 42 yiru.

Parnok rongnung arishi küm 40 aser 56 tain tetsür ana densema lir.

Iba flat nung block ka raksatsüogo aser tekumzüker temi ki teraksa nung takum alirtem bushir ta iba yimti indang mayor-i ashi.

Russia nunger missile tabu balala amshia amakba sülen Kharkiv anung meremerema akum. Iba yimti ya arütsü anasa lir, anungji anung nung lia missiles khazüka yoktsü tasak.

Dnipropetrovsk region kübok industry balala aliba Pavlohrad yimti nunga nisung ka asü.

Kyiv nung ghonda ana ser tesadang anünglen nungi amak, koba January 2 sülen talangtiba alitsü. Ki atongtepa süa aliba ka nung mi kaoloka aser ka raksatsüba nung nisung kar yirua liasü.

Tetsür ka ki chirepa alidak nungi atsütet ta osangbener kati ashi. Mezüingbo la ya süogo ta bilema liasü, saka la tang mozü kidang intensive care nung lir. Yirur alirtem ya timba Kyiv indang central Solomianskyi aser western

Sviatoshynsky district tem nungi lir.

Sviatoshynsky district nung nisung aliba ki kar raksatsü. Iba lendong ataloker ghonda ishika lir emergency service ajanga osangbener dang ashiba agi, parnok tang tashi iba lendong atalokba tesem nung lir aser tapoktsü osettem bushir, kechiaser missile ka indang shilem kar mapok alitsü ta temulung meleme lir.

Russian missiles khaloktsüba air defence ajanga anüing nung lia khazüka yokba teraksa agi Kyiv kübok danga region asem nung teraksa adokdaksü. Nisung 20 yiru aser 13 mozü kidang lir, ta mayor Vitaliy Klitschko indang office ajanga ashi.

Yimti nung dangalen Russia nungeri amakba sülen yimti nung alirtem bomb shelters nungi temai adoka liasü.

Russia-i aonung missiles 41 khaloktsüba nungi 21 raksatsü, ta Ukraine indang air force ajanga ashi.

Ukraine indang yimti balala nung missile khaloktsüba ya tangbo asangsang nunga lendong tulu lir aser tawa tali tesashiba nung amaker.

Taoba hopta Ukraine sepaitemia Russian energy infrastructure nung tenük yoker amak aser iba mapang St Petersburg yimti nung aliba oil terminal ka nunga maka liasü.

Ust-Luga Baltic Sea export complex nung mi adokba sülen energy company Novatek-i inyaksangshi kar anena liasü.

## Israel-Gaza rara: Gaza nung Israel sepai 24 asü



Gaza Strip south tsütsü Rafah nung Israel-i amakba sülen Palestine nungeri ki o jen teraksa repringba noksa nung angur.

**Jerusalem, Aenjeti/January 23 (Agencies):** Hombarnü Gaza nung sepai 24 tepset ta Israel army-i ashi, koba yangji parnoki ground operation tenzüker sepai timtiba asüba alitsü.

Item rongnung reservists 21 lir, aser parnok ya Israel sepaitemi ki ana poktsü atema mines yutsüba apokba ajanga asü südi, ta Israeli Defense Forces (IDF) ajanga ashi.

Palestine nunger telungpuri iba ki anasa tank ka nung missile ka khaloktsüdang apok südi ta bilemer. IDF ajanga iba tatalokba bushisüingdang.

IDF indang chief spokesman Rear Admiral Daniel Hagari-i ashiba agi, reservists tem ya central Gaza nung Hombar nikonngang 7:30 ako meta Israel tsütsü arütsü len Kissufim nung kibbutz anasa asü.

October 7 nü Hamas teloki amakba sülen Israel south

tsütsü nisung meyririjang aika ainshir aliba pei kidangi meyipa shilangdaksüba operation nung parnok ya shilem agia liasü, ta pai ashi.

Hombarnü Israel mitkar-isa southern Gaza nung ano sepai asem süogo ta shia liasü.

Israel Ato Kilonser Benjamin Netanyahu-i Hombarnü sepaitem asüba ya rara adoker tamajungtiba anogo lir ta ashi.

"Asen sepaitem tenüing nung, asen takum kumzüka

alitsü mechi, takok ajunga mongutet tashi asenoki rara manentsü," ta pai X, taoba mapang Twitter ta ajaba nung zülutsü.

Asürtem osang angazüka temulung shiranger ta Israel Tir Isaac Herzog-ia ashi.

"Linük ajunga tenüing nung ni kinunger den asükhu lemsateper aser yirur alirtem taneptsü angutsü sarasademer," ta pai ashi.

Hamas teloki civilian timba sür nisung 1,300 tepsetba den ano nisung 250 shi pua bener aoba sülen Israel-i rara ya tenzüker aser Hamas samatsütsü nanzüka liasü.

October 7 nü nungi tenzüka Gaza nung raradang sepai 545 tepsetogo aser item rongnung October 27 nü nungi tenzüka alilen nungi raradang sepai 217 süogo, ta IDF website nung shia lir.

Gaza nung Israel-i Hamas den raradang tetsür aser tanurtem timba sür nisung 25,295 tepsetogo, ta Hamas meyong health ministry ajanga ashir.

### Col. Nayudu Trophy: Nagaland-i run 346 agi Arunachal kokogo



**Dimapur, Aenjeti/January 23 (TYO):** Tang asaya aliba Col. C.K Nayudu Trophye 2-23-24 nung Nagaland team-i Arunachal team run 346 agi kokogo.

Toss koka mezüng field asütsü shim aser mezüngbuba innings nung Nagaland team-i asayar ajak out sür run 260 yanglu. Nagaland team nungi Zipa Pohena-i run 108 yanglua Nagaland Nagaland U-23 team jenjang kanga junga kümduksü aser pa den Sujal-i run 34, Hem-i 27 aser Tohuka-i run 25 yanglua liasü.

Arunachal team nungi Amarjeet Sharma-i wicket 4, Leki Tsering-i 3 aser T Muri-i

wicket 2 agia liasü. Arunachal team-i mezüngbuba innings nung asayar ajak out sür run 88 dang yanglutet. Nagaland team bowler tem rongnungi Raja-i wicket 5, Hem-i 2 aser Neizekho o Dip nati wicket kaka agi. Arunachal atema Leki Tsering (run 22) aser Teli Rade (run 17) nati dang tera junga asaya liasü.

Nagaland team-i Follow on chidakstüter lila saka parnoki batting amentsü telemteba agi aser tanabuba innings nung parnoki asayar ajak out sür run 218 yanglua liasü. Nagaland team atema Afzal-i run 53, Hem-i 50, Sujal-i 34 aser

Mughavi-i run 27 yanglua liasü. Arunachal team bowler tem rongnungi Mibom-i wicket 5, T Muri-i 3 aser Amarjeet-i wicket 2 agia liasü.

Tanabuba innings nung Arunachal team batting amenba mapang parnoki asayar ajak out sür run 44 dang yangluteta liasü. Parnok rongnungi Devansh Gupta-i run 14 aser T Muri-i run 11 yanglua liasü.

Nagaland team bowler tem rongnungi Neizekho-i wicket 4, Raja-i 3, Odilemba-i 2 aser Hem-i wicket 1 agia liasü.

Nagaland U-23 team taruba asaya Manipur den January 28 nungi 31 tashi Sovima Cricket Ground nung asayatsü.

### Longsa Lensar Zünga-i 11th Open Futsal Tournament ayonger

**Mokokchung, Aenjeti/ January 23 (TYO):** Lensar Zünga, Longsa-i ayongzükbba 11 buba Open Futsal Tournament January 26 aser 27, 2024 anogo ananü Longsa Volleyball Ground nung akatsü, ta osang ajanga metetdaksü.

Iba asayamung nung PS to advisor Minority Affairs & Sericulture Govt. of Nagaland, Tiaonen Jamir tongti tesemdanger aser Dr. Tialiba Longkumer tetushi nija senpet - Highest Scorer, tesemdanger asütsü jaoka lir.

Best Player aser Best Goalkeeper-tem shimtsü, ta tayongerisa metetdaksü. Asayamung nung shilem aginürtemi iba mobile phone - 8787831509 ajanga tayongertem tongtettsü.

### Rohit Sharma ICC Men's ODI Team captain kümtsü



**Aenjeti/January 23, 2024**

**(Agencies):** India team captain Rohit Sharma, the ICC Men's ODI Team of the Year 2023 captain kümtsüogo. Iba team nung India nunger asayar Virat Kohli, Shubman Gill, Mohammed Siraj, Mohammed Shami aser Kuldeep Yadav nungera densema lir.

"ICC Men's ODI Team of the Year 2023 nung ICC Men's Cricket World Cup nung final asayaba team Australia aser India na nungi asayar timba lir," ta International Cricket Council (ICC)-i Mongolbarnü ashi.

ICC men's T20I Team of the Year captain asütsü Suryakumar Yadav shima liasü. Iba team nung India nunger asem lir.

2023 küm Rohit-i kanga junga asaya pai run 1255 yanglu aser pa indang average 52 liasü. ODI World Cup nunga pai tongibang shilem agia liasü.

Rohit indang opening partner Shubman Gill-ia 2023 küm kanga junga asaya run 1584 yanglua laisü.

Australia nunger opener Travis Head-ia 2023 küm kanga junga asayaogo, kong India den World Cup final asayaba mapang run 137 yangluba densema lir.

India nungersa Virat Kohli-ia taoba küm kanga junga asaya century trok tashi yanglua liasü.

World Cup nung pai Sachin Tendulkar-i yanglur aliba record ajateta ODI nung century timtiba yangluba asayar aküm aser Player of the Tournament naroküma agizüka liasü.

New Zealand nunger asayar Daryl Mitchell-ia taoba küm kanga junga asayaogo. Pai century pongu azük aser ajak senteper run 1204 yanglua liasü.

Team nung South Africa nunger asayar Heinrich Klaasen wicketkeeper-batter ama shimogo. SA nungersa Marco Jansen team nung züngoksemogo. Pai taoba ita 12 tsüngda batting aser bowling naprongla kanga junga süogo.

India nunger bowler tem rongnungi Mohammed Siraj, Mohammed Shami aser spinner Kuldeep Yadav nungeri 2023 küm kanga junga asayaba ajanga team nung züngoksemogo.

ICC Men's ODI Team of the Year 2023: Rohit Sharma (captain, India), Shubman Gill (India), Travis Head (Australia), Virat Kohli (India), Daryl Mitchell (New Zealand), Heinrich Klaasen (wicketkeeper, South Africa), Marco Jansen (South Africa), Adam Zampa (Australia), Mohammed Siraj (India), Kuldeep Yadav (India) aser Mohammed Shami (India).

### Australian Open: Djokovic aser Gauff na semifinal-i iogo



**Aenjeti/January 23, 2024 (Agencies):** Tanga asaya aliba Australia Open quarter final nung Mongolbarnü Taylor Fritz den kanga toktepa asayaba sülen Novak Djokovic-i asaya koka semifinal tongtetogo.

Djokovic iba asayamung nung otsüsütsüsa Grand Slam 25buba akoktsü atema meranga asayaba mapang ka lir.

Serbia nunger world number 1 asayar yagi Mongolbarnü quarter final asaya ya 7-6 (7/3), 4-6, 6-2, 6-3 agi koka liasü aser pa semifinal nung Jannik Sinner mesüra Andrey Rublev den asayatsü.

Iba takok anguba sülen

Djokovic-i Melbourne nung asaya 33buba atonga kokogo. Pa 2022 küm coronavirus vaccine magiba ajanga iba asayamung nung shilem magiteti liasü.

Tennis asaya puti otsü nung kija asaya Grand Slam 25 akokba mezüngbuba asaya akümstü atema Djokovic-i asaya ana dang akoktsü nüngdaker.

Tang tashi nung pai Australian Open semifinal tonga asayaba sülen khen danga tamakok ngua mali.

Kasa asayamung tetsür kija asaya nung US Open champion Coco Gauff-i Mongolbarnü

unseeded asayar Marta Kostyuk koka Australian Open tetsürkija asaya semi-final tongtetogo.

Rod Laver Arena nung America tsürla yagi Ukraine tsürla ya 7-6 (8/6), 6-7 (3/7), 6-2 agi koka liasü. Tena ghonda asem sür minute ti asaya liasü.

Semifinal nung la defending champion aser second seed asayar Aryna Sabalenka mesüra ninth-seeded Barbora Krejickova den Bresthostibarnü asayatsü.

Iba asaya akokba sülen Gauff tang tashi nung asaya 10 nung khen danga tamakok mongui asaya arudar.

## BILEMDANGANG

"Akümstübu aginüra naia akümstübuang."